

गलातियाय् च्वंगु मण्डलीयात पावलं च्वःगु पौ म्हसीका

भिंगु खँ न्यनावँसेलि यह्दीमखुपिन्सं नं येसू ख्रीष्टयात विश्वास याना हल। थुबलय् धात्थेंम्ह ख्रीष्टियन जुइत मोशायागु व्यवस्था मानय् यायेमाः कि म्वाः धयागु खँ पिहां वल। पावलं थ्व पतिइ अथे मखु, ख्रीष्टयात विश्वास यानाः हे जक परमेश्वरया न्ह्यःने ठीक ठहरय् जुइ धकाः धयातःगु दु। तर रोमी साम्राज्यया एशियाय् लाःगु गलातिया धाःगु प्रान्तय् च्वंगु मण्डलीइ पिनें वःपिं मनूतय्सं पावलयागु विरोध यानाः मोशायागु व्यवस्था मानय् याःसा जक परमेश्वरया न्ह्यःने ठीक ठहरय् जुइ फइ धकाः धयाजुल।

पावलं थ्व पतिइ थुकथं फताहा प्रेरिततय्गु खं लें द्रुंका च्वपिं विश्वासीतय्त विश्वासय् लितहयेमाःगु खँ नं न्ह्यथनातःगु दु। नापं थः धात्थेंम्ह प्रेरित खः धयागु दसु नं बियातःगु दु। धात्थेंम्ह प्रेरित परमेश्वर पाखेंयाम्ह जुइ, सुं मनूयापाखें वःम्ह मखु। पावलं थःत यह्दीमखुपिनिगु निंति छवयाहःगु खः धकाः अप्वः बःबियातःगु दु। अनंलि वं विश्वासं यानाः जक परमेश्वरया न्ह्यःने ठीक ठहरय् जुइ फइ धकाः नं बःबियातःगु दु। दकलय् लिपायागु अध्यायलय् पावलं विश्वासीतय्सं ख्रीष्टयात क्वातुक विश्वास यात धाःसा इमिगु चालचलनय् नं ख्रीष्टयागु माया खने दइ धकाः क्यनातःगु दु।

धलः पौ

न्ह्यखँ १:१-१०

पावल अधिकार दुम्ह प्रेरित खः १:११-२:२१

परमेश्वरयागु दया मायायागु भिंगु खँ ३:१-४:३१

छुत्कारायागु खँ व यायेमाःगु ज्या ५:१-६:१०

क्वचाय्कूगु ६:११-१८

गलाती

पावलपाखें ज्वजलपा

1 मनूतयपाखें मखु, येसू ख्रीष्ट व वय्कःयात हानं म्वाकादीम्ह परमेश्वरं प्रेरित यानाः छवयाहःम्ह जि पावल व

2 जिलिसें थन दुपिं दाजुकिजापिनिपाखें गलातियाय् च्वंगु मण्डलीयात ज्वजलपा!

3 इी परमेश्वर बा: व प्रभु येशू ख्रीष्टया दया माया व शान्ति छिमित दयेमा।

4 थ्व मभिं गु इलं बचय् यायेत इीगु पापयागु नितिं इी परमेश्वर बा:नं धयादी थें येशू थ: हे सिनादिल।

5 परमेश्वर सदां त:धना च्वनेमा! आमेन।

भिं गु खँ छता हे जक दु

6 छिपिं खना: जि अजू चायाच्चनागु दु। गुलि याकनं छिपिं छिमित येशू ख्रीष्टपाखें दया माया याना: स:तादीम्ह परमेश्वरपाखें फहिलावन। अले मेगु हे भिं गु खँयात विश्वास या: जुयाच्चन।

7 धात्थें धायेमाल धा:सा ख्रीष्टयागु भिं गु खँ बाहेक मेगु भिं गु खँ मदु। गुलि गुलि मनूत छिमिथाय वया: छिमित स्यंकेत ख्रीष्टयागु भिं गु खँयात मेकथं हिलेत कुत: यानाच्चंगुलि जिं थथे धायेमा:गु ख:।

8 अयजूगुलि जिपिं हे थजुइमा, स्वर्ग व:म्ह स्वर्गदूत हे थजुइमा, छिमित जिमिसं न्हापा कना थकागु भिं गु खँयात हीका: सुनानं न्यंकल धा:सा वयात सरा: लायेमा।

9 न्हापा नं जिमिसं थ्व खँ धायेधुन। आ: हानं छक: थ्व हे खँ धाये – छिमिसं विश्वास याये धुंकूगु भिं गु खँयात हीका: न्यंकीपिन्त सरा: लायेमा।

10 जिं थथे धयाच्चनागु छु मनूतयत लयतायकेत ख: ला? मखु! जिं ला परमेश्वरयात हे लयतायकेत थथे यानाच्चनागु ख:। जिं मनूतयत लयतायकेत यानागु जूसा जि येशू ख्रीष्टया सेवा याइम्ह दास हे जुइ फइ मखु।

पावल गथे याना: प्रेरित जुल

11 य:पिं दाजुकिजापि, जिं छिमित छता खँ धाये – जिं न्यंकागु भिं गु खँ मनूतयगु बुद्धिं पिहां व:गु मखु।

12 सुं मनुखं थ्व खँ जित: ना धका: ब्यूगु नं मखु, अले सुनानं थ्व खँ जित: स्यंगु नं मखु। थ्व भिं गु खँ जित: बियादीम्ह ला येशू ख्रीष्ट ख:।

13 न्हापा यहूदी धर्मकथं जुया च्वनाबलय जि गज्या:म्ह ख: धका: ला छिमिसं बांलाक हे स्यू। परमेश्वरया मण्डलीयापिन्त जिं गुलि दु:खकष्ट व सास्ती बिया, अले थुमित नाश हे यानाछवयेत कुत: यानाम्ह नं जि हे ख:।✧

14 जि ज्वलिज्वःपि मध्ये दकलय् अप्वः यहदी धर्म मानय् याना जुयाम्ह नं जि हे खः। झी तापाःबाज्यापिनिगु थितिकुति दकलय् अप्वः मानय् याना जुयाम्ह नं जि हे खः।☆

15 अयनं दया यानादीम्ह परमेश्वरं जि बु हे मबूनिबलय् निसें जितः ल्ययादिल। अले थथे वय्कःयागु ज्या याके छवयाहयादिल।

16 यहदीमखुपिन्त भिंगु खँ न्यंके छवयेत जितः परमेश्वरं हे वय्कःया काय्यागु खँ फुक्क सीके बियादिल।☆

उबलय् जिं सुयाकें छुं नं न्यनेकने मयाना।

17 जि स्वयाः न्हापायापि प्रेरिततयके सल्लाह कायेत जि यरूशलेमय् नं मवना। बरु जि उग्रिमय् अरब देशय् वना। अले अनं दमस्कसय् तुं लिहां वया।

18 स्वदँ लिपातिनि केफास धाःम्ह पन्नुसयात नापलायेत जि यरूशलेमय् वना, व नाप जि बाःछि तक च्वना।☆

19 अन जिं प्रभुया किजा याकूब बाहेक मेपि सुं प्रेरिततयत नाप मलाना।

20 जिं धयाच्चवानागु थ्व खँ धाथें खः। परमेश्वरया न्ह्यःने जिं मखुगु खँ ल्हाये मखु।

21 लिपा यरूशलेमं जि सिरियाय् व किलिकियाय् वना।

22 अबलय् तक यहदियाय् च्वंगु मण्डलीयापि मनुतय्सं जिगु ख्वाः खंगु हे मदुनि।

23 इमिसं थथे धाःगु जक न्यनातःगु खः – “न्हापा झीत दुःखकष्ट बिया जूम्ह, अले झीत नाश यायेत स्वःम्ह मनुखं हे आः भिंगु खँ न्यंका जुयाच्चंगु दु।”

24 जिगु जीवनय् थथे हिउपा वःगुलि इमिसं परमेश्वरयात प्रशंसा यात।

2

पावलयात प्रेरिततय्सं लसकुस याःगु

1 झिंय्दँ लिपा बारनाबास नाप जि यरूशलेमय् वना। तीतसयात नं नापं ब्वना यंका।☆

2 परमेश्वरं जितः अन वने हे माः धकाः धयादीगुलि जि वनागु खः। जिं न्हापा यानागु व आः यानाच्चवानागु ज्या सिति मवनेमा धकाः यहदीमखुपिन्त भिंगु खँ न्यंकागु खँ मण्डलीया थकालिपिन्त जक कना।

3 जिनापं वःम्ह तीतसयात ग्रीक जूसां म्हय् चिं तय्केमाः धकाः सुनानं कर मया।

☆ 1:14 १:१४ प्रे २२:३ ☆ 1:16 १:१५-१६ प्रे १:३-६; २२:६-१०; २६:१३-१८ ☆ 1:18 १:१८ प्रे १:२६-३०

☆ 2:1 २:१ प्रे ११:३०; १५:२

4 जिमिसं खीष्टपाखें कयागु छुत्कारायागु खँ सीकेत जिमिगु चिवा कायेत फताहा विश्वासी जुयाः अन वःपिं छम्ह निम्हयूसिनं धाःसा थ्व खँ पितहल। इमिसं जिमित दासयात थें व्यवस्थां धाःथें हे यायेमाः धकाः कर यात।

5 इमिसं धाःगु छता हे खँ जिमिसं मानय् मयाना। थुकथं जिमिसं भिंगु खँय् सत्य दु धकाः छिमित क्यनाबिया।

6 मण्डलीया थकालि धयाजूपिं इपिं न्ह्याक्व हे तःधं जूसां जितः छुं मपाः। परमेश्वरं ख्वाः स्वयाः न्याय यानादी मखु। इमिसं जिगु खँयात कयाः छुं मधाः।☆

7 गथे परमेश्वरं पन्हुसयात यहदीतय्त भिंगु खँ न्यंकेगु ज्या बियादिल, अथे हे जितः नं यहदीमखुपिन्त भिंगु खँ न्यंकेगु ज्या बियादिल धकाः इमिसं सीकल।

8 वयकःयागु शक्तिं हे जितः यहदीमखुपिन्त भिंगु खँ न्यंकीम्ह प्रेरित यानादिल। अथे हे पन्हुसयात नं यहदीतय्त भिंगु खँ न्यंकीम्ह प्रेरित यानादिल।

9 मण्डलीया थां धयातःपिं याकूब, पन्हुस व यूहन्नां परमेश्वरं जितः थ्व ज्या बियादीगु खः धकाः सीकाः बारनाबासयात व जितः मण्डलीया जव ल्हाः यात। जिमिगु ज्या यहदीमखुपिन्थाय् वनेगु, अले इमिगु ज्या यहदीतय्थाय् वनेगु जुल।

10 इमिगु मण्डलीइ च्वपिं नये मखपिन्त ग्वाहालि यायेमाः धकाः जक इमिसं जितः धाःगु खः। थ्व हे ज्या न्हापांनिसें हे यायेगु जिगु मतिइ दुगु खः।

एन्टिओखियाय् पावलं पन्हुसयात ब्वःब्यूगु

11 पन्हुस एन्टिओखियाय् वःबलय् विश्वासी मनूतयगु न्ह्यःने हे जिं वयात ब्वः बिया, छायाधाःसा सी दयकः हे वं टुंकूगु खः।

12 याकूबं छवयाहःपिं मनूत वये न्ह्यः पन्हुसं यहदीमखुपिं विश्वासीतनाप नयेत्वनेगु यानाच्चन। इपिं वये धुंकाः म्हय् चिं तयेमाः धकाः धाइपिं मनूत खनाः ग्यानाः पन्हुसं यहदीमखुपिं नाप नयेत्वनेगु त्वःताबिल।

13 पन्हुस नाप जूपिं यहदी विश्वासीतय्सं नं अथे हे यात। इमिसं यानाः बारनाबासंनापं अथे यात।

14 इपिं थथे सत्य भिंगु खँयागु लँपुइ मजगु खनाः जिं पन्हुसयात फुक्कसिया न्ह्यःने थथे धयाबिया – “यहदी जुयाः नं छि यहदीमखुम्ह मनू थें जुयाच्चन। छि ला यहदी थें मच्चं। थुकथं छिं यहदीमखुपिन्त यहदीत थें जू धकाः गथे यानाः धया जुइगु?”

विश्वासं जक मुक्ति काये फइ

15 झीपिं बसांनिसें हे यहदीत खः। झीपिं यहदीमखुपिं मनूत थें पापी मखु।

16 अथेसां येशू ख्रीष्टयात विश्वास याःसा जक परमेश्वरं मुक्ति बियादी धकाः झीसं स्यू। व्यवस्था मानय् यानाः जक धर्मी ठहरय् जुइ फइ मखु, येशू ख्रीष्टयात विश्वास याःसा जक धर्मी ठहरय् जुइ धकाः झीसं नं येशू ख्रीष्टयात विश्वास यानागु खः। व्यवस्था मानय् यानाः जक ला सुं नं धर्मी जुइ फइ मखु।✠

17 येशू ख्रीष्टयात विश्वास यानाः धर्मी ठहरय् जुइत स्वयाः नं झीसं यहदीमखुपिन्सं थें पाप याना हे च्वन धाःसा ख्रीष्टं झीत पापी यानादीगु जुइ ला? मखु, थथे मखु।

18 त्वःताछ्वये धुनागु व्यवस्थायात जिं हानं मानय् यानाः धर्मी जुइत स्वल धाःसा जि पापी जुइ।

19 छायाधाःसा परमेश्वरया नितिं जि म्वाये फयेमा धकाः व्यवस्थापाखें व्यवस्थाया नितिं जि सिनागु।

20 जि ख्रीष्टनाप कूसय् सी धुन, जि थः हे म्वानाच्चनागु मखु, बरू ख्रीष्ट जिके म्वानादीगु खः। जि ला आः जितः माया यानाः जिगु नितिं सिनादीम्ह परमेश्वरया काययात विश्वास यानाः म्वानाच्चनागु खः।

21 परमेश्वरयागु दया माया जिं सितिं छ्वये मखु। व्यवस्था मानय् यानाः मनूत धर्मी ठहरय् जुइगु जूसा ख्रीष्ट सिनादीगु सितिं वन।

3

व्यवस्थां ला कि विश्वास?

1 अय् मूर्ख गलातीत, छिमित सुनां स्यंकल? येशू ख्रीष्टयात कूसय् यख्खानाः स्याःगु खँ छिमिगु हे न्ह्यःने ध्वाथुइक कनागु मखु ला?

2 व्यवस्था मानय् यानाः परमेश्वरं छिमित पवित्र आत्मा बियादीगु ला कि येशू ख्रीष्टयागु भिंगु खँ न्यनाः विश्वास यानाः बियादीगु?

3 छिपिं छाया थपायसकं मूर्ख जुयागु? छिमिसं आत्मां शुरु यानाः आः छु छिपि थःगु हे शक्तिं फुना वनेत्यनागु ला?

4 छिमिसं थुलिमछि दुःख फयागु सितिं वन ला? मखु, अथे जुइ मखु।

5 परमेश्वरं छिमित पवित्र आत्मा बियाः अजू चायापुगु ज्या याके बियादीगु छिमिसं व्यवस्था मानय् याःगुलि खः ला कि येशू ख्रीष्टयागु भिंगु खँ न्यनाः विश्वास याःगुलि?

6 अब्राहामयात स्व! वं याःगु खँ धर्मशास्त्रय् थथे च्वयातःगु दु – “अब्राहामं परमेश्वरयात विश्वास याःगुलि परमेश्वरं वयात धर्मी ठहरय् यानादिल।”☆

7 थथे जूगुलि परमेश्वरयात विश्वास याइपिं मनूत हे अब्राहामया धात्थेयापि सन्तान खः धकाः छिमिसं थुइकि।☆

8 यह्दीमखुपिन्सं परमेश्वरयात विश्वास यात धाःसा परमेश्वरं इमित नं धर्मी ठहरय् यानादी धकाः न्हापा हे धर्मशास्त्रय् च्वयातःगु दु। अय्जूगुलि हे अब्राहामयात परमेश्वरं “छंगुपाखें हे संसारय् च्वपिं फुक्क जात जातितय्त आशिष बी” धकाः धयादिल।☆

9 गथे अब्राहाम परमेश्वरयात विश्वास याःगुलि धर्मी ठहरय् जुल, अथे हे वय्कःयात विश्वास याक्वसिनं आशिष काये खन।

10 व्यवस्थाय् जक भलसा तया च्वपिं मनूत सराः फयाच्चपिं खः। थ्व हे खँ धर्मशास्त्रय् थथे च्वयातःगु दु – “व्यवस्थाय् च्वयातःगु फुक्कं सदां मानय् यानाच्चने मफुपिं मनूतय्सं सराः फयेमाली।”☆

11 व्यवस्था मानय् यानाः सुं नं धर्मी ठहरय् जुइ फइ मखु धयागु खँ ला छिमिसं आः बांलाक थुल हे जुइ। धर्मशास्त्रय् हानं थथे च्वयातःगु दु – “परमेश्वरयात विश्वास यानाजुइन्ह मनू सदां म्वानाच्चनी।”☆

12 व्यवस्था पूर्वक मानय् याइपिन्सं धाःसा परमेश्वरयात विश्वास याये म्वाः। “व्यवस्था मानय् याइपिं व्यवस्थापाखें हे म्वाइ” धकाः धर्मशास्त्रय् च्वयातःगु दु।☆

13 येशू ख्रीष्टं व्यवस्थाया सरापं झीत मू पुलाः त्वःतकादिल। वय्कलं कूसय् यग्गानाः झीगु सराः थःम्हं फयादीगु दु। व्यवस्थाय् धयातःगु दु “सियागु थामय् यख्खाइम्हयसित सराः लाइ।”☆

14 यह्दीमखुपिन्त नं येशू ख्रीष्टपाखें परमेश्वरं अब्राहामयात बी धयादीगु आशिष बियादीगु दु। उकिं झी विश्वास याना च्वनापिन्सं नं झीगु विश्वासं यानाः बी धयातःगु पवित्र आत्मा कायेखनी।

व्यवस्था व बाचा

15 यःपिं दाजुकिजापिं, मनूतयगु हे दसु काये – निम्ह मिलय् जुयाः च्वयातःगु भ्वंयात सुनानं स्यंके फइ मखु, अले हानं उकी छुं तने नं फइ मखु।

☆ 3:6 ३:६ उत १५:६; रोम ४:३ ☆ 3:7 ३:७ रोम ४:१६ ☆ 3:8 ३:८ उत १२:३ ☆ 3:10 ३:१० व्य २७:२६ ☆ 3:11 ३:११ हब २:४ ☆ 3:12 ३:१२ लेवी १८:५ ☆ 3:13 ३:१३ व्य २१:२३

16 परमेश्वरं अब्राहामनाप व वया सन्ताननाप बाचा चिनादीगु खः। वय्कलं तःम्हय्सित “अब्राहामया मचाखचा” धकाः धयामदी, बरु “अब्राहामया सन्तान” जक धयादिल। थन “सन्तान” धयादीगु छम्हय्सित जक खः, अले थ्व ख्रीष्ट येशूया बारे धयादीगु खः।☆

17 परमेश्वरं बाचा चिनादीगु गुबलें हे ल्वःमंकादी मखु। थथे वय्कलं चिनादीगु बाचायात प्यसः व स्विदें लिपातिनि वःगु व्यवस्थां सिति छवये फइ मखु।☆

18 परमेश्वरं बी धयादीगु आशिष व्यवस्था मानय् यानाः दइगु खःसा ला थ्व परमेश्वरया बाचा हे मजुल। परमेश्वरं अब्राहामयात बाचा यानाः आशिष बियादीगु खः।☆

19 अयसा व्यवस्था छाय् बिल लय्? मभिंगु ज्याखँ सीके बीत परमेश्वरं झीत व्यवस्था बियादीगु खः। अयनं परमेश्वरं बाचा चिनातःम्ह ख्रीष्ट मझातले जक व्यवस्था दयाच्चनी। थ्व व्यवस्था परमेश्वरं स्वर्गदूततय्पाखें मोशायत बीके हयादीगु खः। थुकथं मोशा मनूत व परमेश्वरया दथुइ ज्या याइम्ह जुल।

20 दथुइ च्वना ज्या याइम्ह निम्हया दथुइ जुइ। अयनं परमेश्वर ला छम्ह हे जक दु।

व्यवस्था छाय् माल?

21 अयसा छु व्यवस्था परमेश्वरयागु बाचाया अःखः जुल ला? मखु, व्यवस्था परमेश्वरयागु बाचाया अःखः मजू। मनूतय्त जीवन दयेमा धकाः व्यवस्था बियादीगु जूसा व्यवस्थां हे मनूत परमेश्वरया न्ह्यःने धर्मी ठहरय् जुइगु खः।

22 येशू ख्रीष्टयात विश्वास याक्वसित परमेश्वरं बियादी धकाः धयादीगु मुक्ति काये फयेमा धकाः धर्मशास्त्रं संसारय् च्वंपिं फुक्कसितं पापय् लाकातःगु दु।

23 विश्वास यायेगु ई वये न्ह्यः हे व्यवस्थां झीत कुनातल। थथे व्यवस्थां झीत कुनातःगु येशू ख्रीष्ट मझातले जक खः।

24 विश्वासं हे झीपिं परमेश्वरया न्ह्यःने धर्मी ठहरय् जुइमा धकाः ख्रीष्ट ज्ञाये न्ह्यः व्यवस्थायात झीत स्यनीम्ह गुरु थें याना तल।

25 आः धाःसा विश्वास यायेगु ई वये धुंकल, उकिं आः झीपिं व्यवस्थां धाःथें च्वने म्वाल।

26 येशू ख्रीष्टयात विश्वास यानाः वय्कः नाप मिलय् जूगुलि छिपिं फुक्कं परमेश्वरया सन्तान जुल।

27 ख्रीष्टयात विश्वास यानाः बप्तिस्मा कयाः वयक्कः नाप मिलय् जूपि सकसिनं पहःचहः न्हगु वसः थें पुंगु दु।

28 अयजूगुलि आः यहदीत व यहदीमखुपिं छु हे मपात। दास व दासमखुपिं, अले मिजं व मिसा नं मपात। येशू ख्रीष्टयात विश्वास याःगुलि छिपिं फुक्कं छम्ह हे जुल।

29 छिपिं ख्रीष्टया मनूत खःसा अब्राहामया सन्तान नं खः। अले परमेश्वरं बी धकाः बाचा चिनादीगु छिमित नं बियादी।☆

4

1 जिं छु धाये धाःसा – अबुयागु सम्पत्ति फुक्कं वया कायपिनिगु खःसां मचाबलय् इपिं च्यः थें हे जुयाच्चनी।

2 अबुम्हयसिनं मधातले इपिं इमित सुसाःकुसाः यायेत तयातःम्हयसिनं धाःथें च्वनेमाः।

3 विश्वास याये न्ह्यः झीपिं नं मस्त थें खः, अले झीत संसारयागु मभिगु आत्मां चिनातल।

4 परमेश्वरं धयादीगु ई वयेवं परमेश्वरं वयक्कःया काययात छवयाहयादिल। वयक्कः मिसाम्हयसिगु क्वखं बुल। अले यहदीतयगु व्यवस्था मानय् यानाः च्वनादिल।

5 व्यवस्था मानय् यानाच्चंप्पिन्त व्यवस्थां लिगनाः परमेश्वरया कायपिं यायेत वयक्कलं थथे यानादीगु खः।☆

6 झीपिं नं परमेश्वरया कायपिं खः धकाः सीकेत परमेश्वरं थः काययागु आत्मा झीगु नुगलय् तयादिल। अले थ्व हे आत्मां झीगु नुगलं “अब्बा, जिमि बाः” धकाः धयादी।

7 थथे जूगुलि छिपिं आः दास मखुत, बरु परमेश्वरया कायपिं जुइ धुंकल। उकिं वयक्कलं थः सन्तानयात फुक्क अधिकार बियादी।

पावलं गलातीतयगु च्यूताः काःगु

8 न्हापा परमेश्वरयात म्हमस्यगुलि छिपिं परमेश्वर हे मखुपिं मेपिं घःतय् दास जुयाच्चंगु खः।

9 आः छिमिसं परमेश्वरयात म्हसी धुंकल। वयकलं नं छिमित म्हसीकादिल। आः हानं छिपिं गथे यानाः व हे ज्यालगय् मजूपिं व पुलांपिं घःतय्थाय् लिहां वनेफुगु? छु छिपिं हानं इमि दास जूवनेगु ला?

10 थौं छिमिसं खास न्हि, थितिकुति, ला, रितु व दँयात मानय् यानाच्चन।

11 उकिं छिपिं स्यनावनी धकाः जितः तसकं पीर जुयाच्चन। छिमिथाय् वयाः उलिमछि दुःखकष्ट सियाः जिं ज्या याना थकागु सिति वनीगु जुल ला?

12 यःपिं दाजुकिजापिं, जिं छिमित बिन्ति याये – जिं याना थें तुं छिमिसं नं या। जि छम्ह यहदी खःसां छिपिंनाप यहदीमखुपिं थें जुयाच्चने धुन। छिमिसं जितः छुं हे मभिकूगु मदु।

13 दकलय् न्हापा छिमित भिंगु खँ न्यंकाबलय् जि म्हंमफु धयागु खँ छिमिसं लुमंकातःगु दयेमाः।

14 म्हंमफुसां जितः हेला मयासें छिमिसं भचा हे थाकु मचासे बिचाः यात। स्वर्गदूतयात व ख्रीष्टयात थें छिमिसं जितः दुकयाः सुसाःकुसाः यात।

15 छिपिं अबलय् गुलि लयताःगु। जि जक ज्यूसा थःगु मिखा लिकया बीत तक नं छिपिं न्ह्यचिली। थ्व खँय् जिं साक्षी बी फु। आः जक छिमित छु जुल?

16 सत्य खँ कनागुलि जि छिमि शत्रु जुल ला?

17 मेपिं मनूतय्सं छिमित लयताय्केत स्वयाच्चंगु दु, अथेसां इमिगु मति मभिं। इपिं छिमित जिपाखें लिगनाः थःपाखे साला कायेत स्वयाच्चंपिं खः।

18 मेपिनिगु खँ न्यनेगु नं बां हे लाःगु खँ खः। अयनं न्ह्याबलें भिंम्ह मनूयागु जक खँ न्यनेमाः। जि दुबलय् जक मखु, मदुबलय् नं छिमिसं थथे यायेमाः।

19 छिपिं ख्रीष्ट थें मजुतले जितः मचाबू ब्यथा थें दुःख जुयाच्चनी।

20 छिमिथाय् वये फुगु जूसा जिं छिमिगु नुगलय् ध्वाथुइक खँ कनेगु खः। छिमिगु खँय् जिं छुं हे क्वःछी मफया च्वन।

हागार व सारायागु दसु

21 व्यवस्था मानय् याये मास्ति वःपिन्त जिं धाये – व्यवस्थां छु धाइ व छिमिसं मस्यू ला?

22 व्यवस्थाय् थथे च्वयातःगु दु – अब्राहामया निम्ह कायपि दु। छम्ह काय् भ्वातिपाखें बूम्ह, अले मेम्ह ब्याहा यानाहःम्ह कलाःयापाखें बूम्ह।☆

23 भ्वातिपाखें बूम्ह अब्राहामया काय् इमिगु इच्छां बूम्ह खः। ब्याहा याना हःम्हपाखें बूम्ह काय् धाःसा परमेश्वरयागु बचंकथं बूम्ह खः।

24 थ्व दसु थें खः। थुपि निम्ह मिसा परमेश्वरं बाचा चिनादीगु निता खँ खः। हागार धाःम्ह भ्वाति सीने पहाडय् ब्यूगु व्यवस्था खः।

25 हागार अरब देशया सीने पर्वत खः। व्यवस्था मानय् यानाच्चं पिं मनूत फुक्कं हागारया मस्त जुल, उकिं थुपि फुक्कं दास जुल।

26 सारा धाःसा परमेश्वरं चिनातःगु बाचा थें खः। सारा न्यानातःम्ह भ्वाति मखु, व स्वर्गयागु यरूशलेम थें खः। अले झीपिं वया सन्तान जुल।

27 धर्मशास्त्रय् नं थथे च्वयातःगु दु –

“हे मचा बुइकिमखुम्ह

थारिम्ह लय्ताया च्वँ,

मचा बुइकेबलय्

गुलि दुःख जुइ धकाः

मस्यूम्ह नुगः चायकाः हाला जु।

छाय्धाःसा भाःतनाप च्वनाच्चंम्ह

मिसाया स्वयाः

भाःतं त्वःतूम्ह मिसायागु हे

मस्त यक्व दु।”☆

28 यःपिं दाजुकिजापि, छिपिं इसहाक थें बचंया सन्तान खः।

29 न्हापा थें आः नं भ्वातियापाखें बूपिन्सं परमेश्वरया आत्मां बूपिन्त दुःखकष्ट बियाच्चंगु दु।☆

30 थ्व हे खँय् धर्मशास्त्रय् लु धकाः च्वया तल? “भ्वातियात व वया काय्थात पितिनाछव। छाय्धाःसा ब्याहा यानाहःम्ह कलाःपाखें बूम्ह काय्न् थें वं थः अबुयागु सम्पत्ति काये दइ मखु।”☆

31 अयजूगुलि यःपिं दाजुकिजापि, झीपिं भ्वातिनं बुइका तःपिं सन्तान मखु, बरु ब्याहा याना हःम्हयसियापाखें बूपि सन्तान खः।

5

ख्रीष्ट येशू छुत्कारा बियादी

1 छुत्काराया निति ख्रीष्ट येशू झीत छुत्कारा बियादी धुंकल। उकिं आ: छिपि साहस कया: दँ। हाकनं दासत्वय् मलायेमा।

2 न्यँ, जि पावलं धयाच्चना — छिमिसं म्हय् चिं तया जुल धा:सा छिमिसं ख्रीष्ट येशूयात विश्वास या:गु छुं हे ज्यालगय् मजुल।

3 म्हय् चिं तयेमा: धाइम्ह मनूयात जिं हानं धाये — म्हय् चिं त:म्ह मनुखं व्यवस्थायागु फुक्क खँ मानय् मयासें मगा:।

4 व्यवस्था मानय् याना: परमेश्वरया न्ह्य:ने धर्मी ठहरय् जुइत स्वइपि मनूत ख्रीष्ट येशू नाप मिलय् जुइ फइ मखु। अले थज्या:पिं मनूत परमेश्वरयागु दया मायां तापाना च्वनी।

5 जिमिगु आशा ला परमेश्वरं हे जिमित धर्मी ठहरय् यानादी धयागु ख:। अले परमेश्वरयागु आत्मायागु शक्तिं हे जिमित विश्वास याये फय्कादी धका: जिपि पियाच्चनागु ख:।

6 झीपि ख्रीष्टनाप मिलय् जुइ धुन धा:सा म्हय् चिं त:सां मत:सां छुं नं पाइ मखु। झीत मा:गु ला विश्वास ख:। थ्व हे विश्वासं याना: झीसं माया याये फइ।

7 छिपि ला बांलाक ब्वाँय् वनाच्चंगु ख:। छिमित सुनां सत्य खँ मानय् याये मते धका: पन?

8 छिमित स:तादीम्ह परमेश्वरं थ्व ज्या याके बियादीगु मखु।

9 “न्हायात:गु छवचुंलय् सोडा भचा जक त्वाकछ्या:सां पवंगाना वइ।”☆

10 प्रभु नाप मिलय् जुयाच्चंगुलि छिपिं अथे मेगु लैय् जुइ मखु धका: जिं पत्या: यानाच्चनागु दु। अथेसां छिमित स्यकेत स्व:पिं, न्ह्याम्ह हे जूसां, इमित परमेश्वरं सजॉय बियादी।

11 य:पिं दाजुकिजापिं, जिं अज्ज नं म्हय् चिं तयेमा: धका: न्यंकाजूगु जूसा जिं अज्जं छाय् दु:खकष्ट फया च्वनेगु? थ्व खँ ख: धयागु जूसा क्रूसय् सिनादीम्ह ख्रीष्टयागु भिंगु खँ न्यंका जूसां जित: सुनानं दु:खकष्ट ब्यू वइ मखु।

12 छिमित स्यकेत स्व:पिं मनूतय्सं म्हय् चिं तयेगु जक मखु म्ह भज्यंक हे स्यंकूसां ज्यू नि।

13 य:पिं दाजुकिजापिं, परमेश्वरं छिमित छुत्कारा बीत स:तादीगु ख:। थ: य:थें याना जुइ मते, बरू माया याना: मेपिन्त ग्वाहालि बीगु या।

14 फुक्क व्यवस्था थ्व हे छगू आज्ञाया दुने ला: — “थ: ज:लाख:लायात थ:त थें माया या।”☆

15 अयनं गुँपशुत थें थथः हे ल्वाना जूसा छिपिं फुक्कं स्यनावनी धयागु खँय् छिमिसं होश यानाच्चँ।

पवित्र आत्मां जाःगु जीवन

16 पवित्र आत्मां धाःथें याना जूसा छिमिसं थः यःथें यानाजुइगु त्वःते फइ।

17 शरीरं ला पवित्र आत्माया विरोधय् व पवित्र आत्मां शरीरया विरोधय् इच्छा याइ। थुपिं निम्ह शत्रु थें खः, उकिं झीसं झीत यःथें याये फइ मखु।✧

18 आत्मां धाःथें याना जूसा छिमिसं व्यवस्थाय् च्वया तः थें याये माली मखु।

19 मनूतयगु बानी छु खः बांलाक हे सी दु। मनूतयगु बानी थ्व हे खः – व्यभिचार यायेगु, मभिंगु मतिइ तयेगु, लाः लाः थें यानाजुइगु,

20 मूर्ति पुजा यायेगु, झँक्री ज्या यायेगु, ल्वाना जुइगु, मेपिन्त मभिकेगु, नुगः मुइकेगु, तंम्वयेगु, थःगु जक भिं स्वयेगु, मेपिन्त ल्वाका जुइगु, अले पुचः पुचः मुनाः बाया जुइगु,

21 डाहा यायेगु, अय्लाः थ्वँ त्वना जुइगु, मोजमज्जा यानाजुइगु, थथे हे मेमेगु ज्या यानाजुइगु। थज्याःपिं परमेश्वरयागु राज्यय् दुहां वने फइ मखु धकाः जिं न्हापा नं धायेधुन, आः नं थ्व हे खँ जिं छिमित धयाच्च्वना।

22 पवित्र आत्माया फल धाःसा माया यायेगु, लयतायेगु, शान्ति याकेगु, सह यायेगु, दया यायेगु, ग्वाहालि यायेगु, विश्वास यायेबहः जुइगु,

23 नम्र जुइगु, स्वजा जुइगु, मनयात चिना तयेगु खः। थथे यानाजुइपिन्त दोष बीगु छुं हे व्यवस्था मदु।

24 येशू ख्रीष्टयापिं मनूतयसं ला थः यःथें यानाजुइगु व मभिंगु ज्या फुक्कं कूसय् यख्वाये धुंकल।

25 आत्मां झीत म्वाकातःगु खःसा झीपिं आत्मां धाःथें च्वनेमाः।

26 झीसं थःथवय् घमण्ड यानाजुइगु, तंम्वया जुइगु व नुगः मुइका जुइगु याये मज्यु।

6

थःथवय् ग्वाहालि याना जु

1 यःपिं दाजुकिजापिं, सुनानं मभिंगु ज्या याःगु खन धाःसा छिपिं परमेश्वरया आत्मां धाःथें याइपिन्सं वयात मिजासं भिकेगु स्वयेमाः। तर बांलाक होश या, थथे यायेबलय् छिपिं थः हे मभिंगु ज्याय् मलायेमा।

2 छम्हयसिनं मेम्हयसित दुःखबलय् ग्वाहालि यायेगु या। थुकथं छिमिसं ख्रीष्ट येशूयागु आज्ञा पूर्वकी।

3 थथे मयासें सुनानं थःम्हं थःत तःधंम्ह धकाः धयाजुल धाःसा वं थःम्हं थःत धोखा ब्यगु जुइ।

4 सकसिनं थःम्हं थःगु ज्यायात जाँचय् याना स्व। थःम्हं यानागु भिंगु ज्याय् लयताया च्वेँ। मेपिन्सं स्वयाः बांलाक यानागु दु धकाः तःधंछुना जुइ मते।

5 छाय्धाःसा फुक्कसिनं थःगु कु थःम्हं हे क्वबीमाः।

6 वचन स्यना काःम्हयसिनं स्यम्हयसित छुं न छुं बी हे माः।

7 धोखा नये मते, परमेश्वरयात गिजय् यायेगु जुइ मखु। मनूतयसं छु पिना तल व हे सय्की।

8 सुनानं थःत यःथे पापी ज्या याना जूसा वयात नरकय् छवइ। सुनां परमेश्वरयात यःथे याना जुइ वयात अनन्त जीवन दइ।

9 अयजूगुलि भिंगु ज्या यायेत थाकु चाये मते। थाकु मचासे ज्या यानाच्वन धाःसा छन्हु झीत परमेश्वरं सिरपाः बियादी।

10 अयजूगुलि मौका दुबलय् हे झीसं मेपिन्त भिंगु यानाबीमाः। अप्वः यानाः विश्वासी दाजुकिजापिन्त यानाबीमाः।

11 जिं थःगु हे ल्हातं ततःग्वःगु आखलं छिमित च्वयाच्वनागु दु।

12 ततःधंगु खँ ल्हानाः तःधं जुया जुइपिं मनूतयसं हे खः छिमित म्हय् चिं तयकेत कर यानाच्वंगु। येशू ख्रीष्ट कूसय् सिनादीगु खँ न्यंकाः दुःखकष्ट फयेमाली धकाः इमिसं थथे याना जूगु खः।

13 म्हय् चिं तयातःपिं मनूतयसं हे नं व्यवस्थाय् च्वया तः थें याये मफु। छिमित म्हय् चिं तयके धुन धकाः तःधंछुइत इमिसं छिमित म्हय् चिं तयकेत स्वयाच्वंगु खः।

14 जिं ला मेगु खँय् मखु, बरु येशू ख्रीष्ट कूसय् सिनादीगु खँय् जक छ्यं धस्वाका। वयकः कूसय् सिनादीगुलि जिगु निति संसार सी धुकल, अले संसारयागु निति जि सी धुन।

15 म्हय् चिं तःसां मतःसां छुं मपा। दक्वसिबय् तःधंगु ला न्हम्ह जुयाः म्वानाच्वनेगु खः।

16 थथे न्हपिं जुयाः म्वानाच्वंपिं धातथेंयापिं इस्पाएलीतय्त परमेश्वरं दया व शान्ति बियादीमा।

17 आः थ्व खँय् सुनानं जितः दुःखकष्ट बी मते, छाय्धाःसा येशूया दास खः धकाः क्यनेगु घाःखू जिं थःगु म्हय् फये धुन।

18 यःपिं दाजुकिजापिं, झी प्रभु येशू ख्रीष्टया दया माया छिमित दयाच्चनेमा।
आमेन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 19 Dec 2025 from source files
dated 17 May 2025

838cc630-4ccf-5055-be45-10a98a141cc7